



Knud Kleemann
Atassut

UKA 2025/51
6. november 2025

Qanoq ililluta ilaqutariinnut suliniarnitta annertusineratigut pisullu tamaasa isiginerisigut meeqqat angerlarsimaffiup avataanut inissinneqarsimasut amerlassusaasa annikillisarsinnaanerat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Bo Martinsen, Demokraatit)

Siunnersuuteqartoq qujaffigalugu imatut Atassummiit ilalerlugu oqaaseqarfigissavarput.

Ila ukiut qassimmita meerannguit angerlarsimaffiup avataanut inissinneqartartut ikilisarnissaat eqqartugaappat. Oqallittuarpugut pilersaarutit annertuut, iliuusissat pilersaaruterpasullu. Inertera ersarippoq. Iliuseriniakkagut ajutoorsimapput. Tamanna nassuerutigisariaqarpugut.

Allaammi aningaasartuutit annertuseriarujussuarsimapput. Siunnersuuteqartorlu isumaqatigaarput allatut iliuuseqartariaqaleratta. Aamma isumaqataavugut oqarmat katsorsaanissamut, oqaloqateqartarnissamut periarfissat annertusartariaqarigut. Tamannalu ukiaq manna Atassummiit siunnersuutigaarput, februarimi oqallisigineqartussaq.

Qularnanngilaq maani inersuarmi tamavitta - nunatsinni meeqqat, allaat meeqqat 6%-iisa arsaarinnissutaasimasut paasillugu tupaallakkatta. Uagut nammineerluta kalaaleqatitta meerartaanik arsaartuivugut. Ajortoqarpoq. Ajortoqavissorpoq.

Angajoqqaat immitsinnut suliarisariaqarpugut. Qamuuna tarnikkut anniaatigut suliarisariaqarpagut - meeqqatsinnut ingerlateqqissanngikkutsigit.

Naalagaaffinngornissaq pimoorunneqarsimappat nammineq inuttut tamavitta suliassaarpugut, akisussaaffeqarpugut. Uagullu pisortaniit oqaloqateqartarnissamut periarfissat annertusartariaqarpagut.

Aamma paaserusunnarsivoq aningaasartuuterparujussuit annertusiartortut ilumut meeqqanut tuttarnersut. Tassani nalilersugassaarpugut.

Taamatut oqaaseqarluta oqallissaarisoq qujaffigaarput.